

康對山先生集

康對山先生集卷之四十

墓志

文林郎知湯陰縣薛君墓志銘

君諱价字德夫後又字藩卿河東人也高祖德仁生
文勉文勉生宏為萊陽縣丞縣丞生某為乾州學正
陞國子博士至保定府通判通判配張氏生藩卿岐
嶷即篤實恭敬不決肆稜角通判公乃固教之曰是
宜能以大吾宗者弘治戊午果舉鄉試高第己未舉
進士不第與予同遊國子壬戌同予舉進士則同第
進士藩卿曰勉哉與子今且委而事矣勉哉與子予

於是益信吾藩卿以為若藩卿乃所以為學也未幾
藩卿除知麻城麻城未幾而通判公卒則歸河東河
東士大夫皆傳藩卿盡喪禮儒者之教歸然存也丙
寅復除知湯陰湯陰地劇五六道也使者冠蓋相望
長吏日中不饗也藩卿處之不見有所困而使者皆
喜得湯陰遄行故一時為令者皆不如藩卿名嚴焉
藩卿為政尚委曲事至思慮反覆猶惴惴然以為過
也故湯陰人至今思藩卿而藩卿故益勞而病病而
不起藩卿在太學時與胙城來嘉會三原秦世觀馬
伯循華州東希節河中史宗道及予遊然皆推藩卿

長者論議古今人物之變及道書之載則從容詳雅
踞衆不以為同而其謙抑自虛之意終日未嘗改也
吾觀藩卿體順而領豐謹言而慎行謂宜高年多福
可以行志而乃不幸如此古人所遺者亡可信邪前
日予以先太夫人之喪歸過湯陰哭藩卿藩卿妻子
匍匐至不能歸也乃天於善人固若此邪藩卿生成
化丁亥八月十八日至正德戊辰十二月十五春秋
四十又二配楊氏生子二夢陽夢鶴夢陽取王氏有
子某方襁褓女二長嫁

代府奉國將軍某淑人次許舉人史周子某正德己

墓山有卷之四
已九月葬花園祖塋之次銘曰引而弗長明而弗光
惟我心傷

迪功郎濬縣丞李君墓志銘

李故為山東萊陽大家世有長者至進士鐸而姓益
顯家聲益傳壬戌冬十月庚申鐸父縣丞君以疾卒
鐸衰杖來請銘曰昔先人以鐸為近穎悟使鐸讀書
學進士鐸舉進士先人日日喜望鐸歸以見也鐸以
官東不能歸然又不能迎之來徒日日望以見吾父
吾父不能見乃又至大變家人言方其漸時切切北
向叫鐸鐸不知不得望其病苦曷不如鄉里之人能

生死俱於親執事不棄鐸罪逆願以銘先人按王進士景狀君諱爰字同仁父凱娶孫氏生君博學善時文能以竒自見凡十試於有司皆不可既後歲貢入國子每季考試輒能竒國子亦能以優第酬其竒然以入有司則又不可其所謂竒者則又不能見君曰是固吾命也弘治庚戌乃就吏部拜濬縣丞丞七年丙辰棄丞以歸歸幾年乃歿距其生之某年春秋六十又三娶董氏生子四人鏜貢士鋒醫學訓科欽不仕鐸今進士某月日葬某地之陽銘曰志不渝于未成而壯者不傾也事不媿於已行而往者不榮也優

於其身而能以名也

叔父第四府君墓志銘

於乎康氏之荼苦何如是深也先君以弘治壬子卒
卒十六年正德丁卯四月中叔父藁城君卒卒纔五
月為九月乙酉四叔父又卒矣骨肉淪謝幾盡於乎
痛哉十月乙亥訃至京師與弟浩為位而哭又十日
浩歸奔喪跽曰父歿矣今亡及矣顧所不朽者唯兄
圖之海哀隕莫知舉也辭曰叔諱鑾字振聲顯祖通
政府君第四子也天性亢爽能孝弟少習禮記學進
士通政府君被

詔入京師家亡舉生事者曰鑾資鈍甚上不若兩兄
下不若弟也宜我舉家人事人且以為火然遂能矣
弘治初及先君卒時家事益窘叔父怏怏不得志乃
入長安求故與賈者皆富矣咸駭喙向曰昔以季父
力故今能裕今季父窘願盡以所有助季父居三月
遂致累數百金乃悉散歸故與為賈者金數年遂鉅
然盛矣然不瑣瑣逐小利每有賈怕減直貨之人曰
季父老曷不善賈也求速賈乃減直貨之後靡有息
矣笑曰彼不知賈道也俟直而後賈此庸賈求不失
也可終歲不成一賈凡吾所為歲可十數賈息固可

十數倍矣故長安人言善賈者皆曰康季父云千金積薪秋雨薪貴視市中半價輒召人貨去券貸去故貧者皆喜趨叔父賈叔父娶高氏南京親軍舍人銓女有婦德能相贊叔父弘治壬子五月戊子享年四十有四先卒生子三人浚浩洋也浚娶張氏繼杜氏縣學廩膳生浩魏氏甲子舉人洋甄氏女長嫁生員張儒珍次聘生員郭完未嫁夭矣後又娶高氏浚生子椿又生女一與浩生女為一孫男二孫女也男子之事備矣亡有憾矣詎正統丙寅九月巳丑至乙酉之日春秋六十有二於乎由先君卒時從祖訓科君

及其夫人相繼卒其貧至不能棺也叔父能勉舉大事并其配高夫人及先君蓋數喪已五叔父書來言冬十一月庚申同三叔父葬茲且柩之何哉銘曰武功之南紙坊之陽叔父以藏與其配行孫子洋洋何用不藏

霑化縣儒學教諭趙公墓志銘

公諱玉字汝石其始祖曰公用子孫第稱曰南京公云蓋自元之盛日趙氏在南屬近者徙西北時公用尚幼而孤至其寡姑與俱徙平涼遂占籍為平涼人然不知為趙氏何屬也杭在宋為南京其曰南京公

可占其苗裔矣。公用娶張氏生佳兒。佳兒洪武三年置府城東門坡下宅。與弟共居。佳兒生得名。得名生榮。榮生子祥禎。福祥子常安。弱冠當婚。逃去為道士。居秦徽山中。獵者每見兩虎倚其廬。升木訊焉。曰：「山居與野獸相狎，無他也。」福以國子生為平谷縣丞。取楊氏生公。幼即莊敬嗜學。外舅考功員外郎靈臺史公書奇之。於是以其長女議婚。云成化甲辰關中飢甚。公時從外舅遊學京師。亟以粧奩歸平谷。云易粟救荒。外舅語諸縉紳咸嘉歎焉。公以偉才積學。凡六試場屋。輒不第。正德丁卯平谷公卒。公既終喪恨不

能成父之志應貢上京師途得金襍甚巨息樹下以
待其主至與之主以什一謝公公馳去不顧廷試後
拜元城訓導值惡教諭伐號房戶牖及文廟樹以貨
督求諸生公唯日坐齋課諸生經書惡教諭愈益嫉
公公不為意也遷霑化教諭凡諸生所餽贈皆辭不
受嘉靖己丑致仕歸環堵敝廬蔬食飲水其意條然
樂也丁酉二月二十四日癸酉公不起矣生天順癸
未九月二十三日己卯春秋七十有五公初娶史氏
生子時元有孫三人守約守敬守業及孫女一早歿
繼娶范氏未舉子而卒繼又娶許氏生子時春及女

子一人為生員張雲龍妻側室王氏生子時泰及一
女子尚幼初時春以已巳歲生公語諸親友曰此兒
有異須吾得學官梯力教之以成吾父之志故有元
城之行後至霑化時春愈益開悟公日以談笑飲酒
為樂壬午時春年十四漁石唐公虞佐石岡蔡公成
之為予道其才美若不容口然但舉鄉試第三人予
私憤焉丙戌會試乃舉第一改庶吉士讀中秘書出
館授刑部主事庚寅上封事罷主事歸光大之業於
正之氣海內推焉公可謂有子矣夫比公疾革遺命
時春朝終夕殮勿停柩勿告訃勿厚葬必以予志其

墓石茲將以月日葬公南山文原時春以狀來請銘
從公志也公之盛德雅操備在家集不可枚舉有子
如刑部終無弗傳者矣銘曰世有哲人必昌厥後其
昌伊何匪祿匪富令聞不忘厥履必厚厥履允厚萬
祀所崇若彼茂草奚其為容於惟先生逝哉鉅宗邇
流循源有倬其洪公需我銘愧無闢襄佳城巍巍令
子所封孝子不替斯公令終

王育之墓志銘

吾友立庵先生第五子曰王寧寧育之者表第閭克
讓壻鳳翔府學生也予昔往鳳翔及育之赴省試皆

嘗見之聽其言論觀其器度以為遠大後之所詣當
卓然為西土先今年正月乙巳乃病嗽不起矣於乎
惜哉世有奇寶天方予而復奪之此固數之使然天
亦莫之何爾於乎惜哉二月癸酉將葬育之于三岔
山先塋其弟舉人完以狀來請予銘其墓石按狀育
之生而穎悟多能博通子史好讀先秦文辭及漢魏
詩作書深得晉意取古今琴曲數日即能一一撫譜
下至曲藝之細無弗喻者嘗謂完曰吾見選世士人
皆習跡弛以至恣妄彼自謂得所處然憂懼乎人竟
何益耳吾弟宜識此毋為所移可也置斂是之十上及

少年所能知者益可以觀其度矣數舉不第人或
慰之者曰吾豈效齷齪九起者邪近又作矜矜論以
自明言人當矜恃其驕矜之心也畧曰夫人見江海
澶洄而無聲乃以為深廣也而不知江海不隤隈故
無磕磕行潦隤隈而磕磕故其涸也可立而待也夫
善惟不足也故挹寸即矜矜則泄速而善莫能久藏
故曰有矜無善夫人矜恃其寸以至于尺而文使積
多不能偏舉斯可矣非名言邪育之為明公子其省
侍大人往來道路無人知者亦可以見韜晦有方也
立庵以治攬頭不撓法謫戍廣東育之恐其母之難

也則日日強顏奉寬退則於邑泣下凡兄弟聚食一
不至必不食疾則親侍湯藥平而後已其孝交出於
天性如此於乎惜哉育之生二男子長曰百里年十
四矣資性穎敏日記數千言可期其成次尚幼二女
子皆未聘銘曰生而神靈乃不永終遺之其子雖約
而豐葬于先兆萬年曷窮

陵川秀才王君合葬墓志銘

君諱景祥字宗賢家世陵川人也祖九成有高德抱
志孤潔耻與惡人言有惡人輒欲避之山谷中曰吾
何以與是人同也生子珉性益淳朴母華居富而能

儉處盛而克謙韓汝慶謂九成有麗鹿門之風而祀
不媿陳大丘之德信矣鄉大夫縣官以為鄉飲賓數
不肯就每戒子孫曰勿好奢以蕩吾家勿好鬪以危
吾家勿履公門以累吾家故其子孫至今號能守法
保家云者其教之所由來者遠也君生值饒裕能好
學不倦治禮經兼解朱氏詩弱冠即有名場屋謂可
拾芥取科第乃不幸死矣豈其氣之不參如此死之
日識與不識莫不悲悼太息曰何遽喪此良士也配
張氏縣名家女有婦德克宜于君君死撫其諸孤能
自樹立門戶曰勿令父笑夫子而已於是悉取所有

財易置田產人或難之曰吾聞子弟恃財而無以教
則因財生蕩田產非易捐者故予置田產所以保遺
財或因以教耳事繼姑武氏克盡孝道武氏老所生
或不能委志奉事而張獨任之非賢而能之乎生男
子四人長璋七品散官次文秀才次平次塤女子一
人為鄉人都章妻孫男子七人長道璋子戊子舉人
朝邑知縣臨洮通判橋路訪坤田皆其次也孫女十
一人皆嫁宦族君生正統年月日卒成化年月日年
蓋三十歲張氏生正統元年十月十八卒弘治十六
年十一月十九蓋幾十有幾君與張氏已葬碓臼掌

先塋二十一年矣道以狀謂予曰幸辱交于夫子乃何忍無銘于先大父之墓願夫子有以為道謀也是銘曰積而已昌發而未光豈數之忽室乃逮厥孫子以長邪後德方張視我銘章

秦安王處士墓志銘

處士諱景惠字良濟家世秦安人也父曰某配某氏處士兄弟二人有厚積恒貸貸致息一日父以所貸券付處士取償處士曰何屑屑與窮人爭錙銖然若此不已勞乎乃受其券而不討其直於是父怒處士以為不若已幹令別居處士即別居伺父顏色稍霽

則復入侍奉於是父以東山之庄與處士令居而留其季子世綸隨已人或異言處士曰兄弟天親凡吾所有事一皆父命我何可以異心也唯弟所欲無弗如其意者已而弟死處士以他事逮官是時官方以暴悍治下無弗恐者處士以理自據官亦無以為罪比出處士哭曰吾弟安知汝兄有此也一日處士顧諸子在側忽垂首柱頤嗚呼噫嘻者數四諸子訝焉乃進而問處士曰吾弟世綸今安在也此其孝友之實出乎天性非勉強可能者於乎聞處士之風者其可以無媿耶燕人某知秦安以處士之誼不可無

訓於鄉人請充鄉飲賓辭不赴御史朱公需為鞏昌
守下令求高年有德可師法於鄉者縣令以處士及
董公上之重嘉嘆焉嘉靖二年三月庚申卒於家享
年六十有七諸子悉其故券焚之曰此先人之志也
配孫氏生五男子評訓皆縣學生謨癸酉舉人詩守
世業訥亦學生四女子各歸名家評等將以十一月
壬申葬處士於城南先塋中子謨以狀來請銘曩者
武選郎中侯君應乾蓋嘗言處士之德與狀無異義
當有銘於是銘曰

惇德秉仁克綏厥親是謂允迪於倫子多而文聿以

致身其道彌尊其譽孔間萬年弗淪諦此佳墳

亞中大夫四川布政司左叅議石君墓志銘

君諱祿字君錫別號蓮峯上世南陽人也七世祖昭勝國時為荆襄總帥佩金虎符因論計不合棄官來商洛而居華郡華郡臨渭二川其後族屬蕃衍更臨渭為石鄉云昭生遠遠生閏閏生著明精於武技不樂仕進有子曰巖君曾祖也生三子某璞秀璞以義勇起家官昭勇將軍騎都尉錦衣衛指揮僉事秀為鄉之善人受高年爵生四子其季曰輝是為封君明法律有力絕人以椽為磁澗遞運大使娶秦氏生君

與其弟爵君幼穎悟英邁不群長補郡學生有文名
弘治戊午舉鄉試明年己未登進士第為南京刑科
給事中倬有建論陞山西按察僉事緝姦剔蠹風采
凜然撫按交薦之會有封君之憂已復除山西僉事
去淹滯之獄慎囹圄之政處馬邑定襄飢饉之害平
寧武之圍山西人深賴之復有秦孺人之憂已即改
除四川時楚人蠻作亂都御史馬宗大以委君君親
冒矢石討平之又為立州建官以杜後弊坐是陞四
川布政司左叅議君曰仕宦何時止乎會當塗者有
言即幡然以歸歸七年為嘉靖甲申六月十一日以

驟感痰厥而卒據其生成化丙戌三月二十二日春秋五十有九予與君同試於鄉同宦於朝雖南北不同交特厚君心志恒夷不拘小節與人言盡布心意居鄉井恂恂謙退若弗知其為達官貴人者此其過人遠矣君在諫垣時會災異條陳八事曰明體統戒逸欲崇敬畏親賢臣遠佞人抑外戚厲官守減力役復有

詔求直言君又陳十事曰親

經筵以弘聖學察賢否以明黜陟公賞罰以服人心儲芻糧以實軍資擇將帥以固疆場罷營造以蘇民

困開言路以決壅蔽父巡撫以便經畧慎守令以字
黎元敦節義以厲風俗皆依事據理克中時宜予竊
有取焉後君在四川每經武功必握手話舊數日而
別據君之能以為必躋顯順乃止於是私甚恠之洎
予頻年遊華觀君躍馬大馳飲食起居若少年人恒
自以為難能顧亦復止於是於戲傷哉君娶黃氏封
孺人內政嚴肅克弼君行生子一宗玉國子生女三
長嫁兵部郎中東君子太學生元次嫁縣丞郭君子
州學生岳季嫁潼關千戶汪君子渥側室詹氏生二
子宗正宗直宗玉生男子曰堅君為生孫也聘左副

都御史屈公次子國子生登之女明年三月某日將
葬君西溪先塋之次宗正持屈公所撰行狀請銘於
予予於是為之銘曰西溪之東有墳窿窿其龍克從
其風有容是惟君之閼宮太華之中子孫雍雍萬年
靡窮

迪功郎伊陽縣丞康可父墓志銘

可父諱求嘉族兄國子生文敷子也文敷兄有大志
瀕幾於仕死遺子二人可父少即有才譽先平陽府
君甚奇之以為光吾宗者此兒也時予少可父十歲
每有戒諭則必稱可父云洎予稍長則始知平陽府

君所稱予甚不輕也予謂可父必第進士成聞人顧
竟不第正德庚午歲貢入國子祭酒魯振之殊惜其
才又十三年壬午上吏部拜伊陽縣丞五年考績當
受上賞乃力求致仕巡撫何道亨懇留不獲竟致仕
歸時嘉靖丙戌秋也是年予歸田里十有九年可父
雖族子義若友生予凡有所言唯得可父始語之可
父性孤特耻與下流遊居官居家清謹之操時輩無
可同日語者故予每以可父為韋弦乃已丑二月十
八日甲申疾作卒矣由生成化乙酉二月十五日壬
辰享年六十有五娶喬氏里人喬銓之女有婦德克

家教子鄉黨宗族以為難能由少至老未嘗出一疾
言此可以知吾可父之有家相也嘉靖十二年癸巳
九月二十日巳未亦卒由生天順壬午四月十七日
壬午享年七十有二生男子四人輅輪輞輞輞有頴
質不幸早死輅治家人業輪輞俱生員孫子十人孫
女子七人先是可父已葬西原新塋今年巳未十二
月十四日庚寅輅等奉其母合葬於可父因來請銘
其墓銘曰學行昭只行藏異只天摧哲人元數戾只
並儷趨化孫子茂只西原孔嘉終亦安只

對山集卷之四十

康對山先生集卷之四十一

墓志

明故封文林郎雲南道監察御史儒學訓導楊公墓志銘

公諱舟字濟川別號訥菴家世武功人也曾祖禮國初舉人才引疾不就祖安父鑑俱孝弟力田為鄉善人鑑生四子長善次鼎次哲季公為縣學生讀書不成父命公繼哲為學生治朱氏易籍然有名於時成化丁酉鄉試已中式錄其文矣有某叅議欲私其門客乃牴落公卷此後累試皆弗售士論惜焉弘治

庚戌應貢上禮部拜夏縣儒學訓導勤以教人禮以自御夏人至今猶誦說不忘云九載滿年尚未及六旬且將陟官也乃幡然告歸家無厚蓄守薄田數十畝其心休休若將終身焉此可以占識公志矣正德辛未長子秉中第進士為行人又三年為御史

勅封公為文林郎雲南道監察御史配張氏封為太孺人太孺人鄉善人貴女也年二十歸於公善執婦道勤儉備至故能相成公學公已有官乃彌喜紡織所衣裙布敝猶不易曰我性蓋如是正德辛巳十一月八日公以疾卒於家繇生正統庚申三月二日春

秋蓋八十有二葬後四年嘉靖丙戌六月二日孺人亦卒繇生正統壬戌六月二十八日春秋蓋八十有五今年戊子九月三日秉中將奉孺人之柩啓壙附葬於公以狀授海請以銘公之墓海自兒童時嘗從鄉先生之後私識公之行事公天性孝友加以稟賦謹厚終其身鄉黨宗族咸無間言兩兄繼歿撫其遺孤無異所出堂叔某死無後葬之以禮又為主時祀於家秉中既貴祿之所入計已饒裕公歆然如布衣時顧自處益儉每飲食至轍以先公先夫人逝不及養感泣不已此亦可以謂有終身之慕矣張孺人性

尤儉素遺訓甚多秉中嘗述以告予曰不肖為御史
曾拜吾母於堂記吾母之言曰我在家時聞人說而
祖善而父將來必做官人我歸而父見而祖接人若
恐傷乃而父果做官爾官視而父又加顯矣此而父
之善所致也而謹識之凡百勿顧目前當從後看可
也不肖携家口北上吾母告吾妻曰我平日過活甚
難今老矣一薪一米未忍輕費世常說節儉勝求人
諸婦宜深念此日用間汝輩不愛惜累及吾兒請勿
復來見我也此皆表表然可以訓及將來比跡古之
賢母者噫嘻盛哉公與孺人生男子二人秉中允中

秉中以御史陞山西按察司副使允中受義民爵女
子一人適里人党厚孫男子八人緣早天余三尚幼
秉中出也純紀俱縣學生而紀夭餘二幼允中出也
孫女子三人秉中所出二一適重慶檢校王堂一許
聘景塾允中所出一適馬河龍俱先歿純出曾孫女
子一人已許聘焉氏苗裔盛矣方公卒時秉中以巡
按四川過家孺人卒時秉中已陞官山西歸省問疾
侍藥屬壙視窆曾無一之不逮所謂不期然而然者
非公與孺人陰德宿厚詎有此哉銘曰 武功之南
厥川惟膺土厚水深公墳俱俱孺人是同奠茲終古

名德在時懿訓如睹子孫振振克遵伊武伊武孔賢
帝命是延豐章蔚誦胥貴公阡南山峩峩漆水湔湔
永言孝思尚慎諦旃

登仕佐郎鴻臚寺序班閻公孺人趙氏合葬墓
志銘

閻故為興平焉菟人由警菴先生宅長安其子孫皆
居長安故遂以趙孺人葬長安南新醮之原而遷序
班公之柩合焉於是子瀚暨溥來武功以銘屬海夫
序班公者海姑表諸父也與趙孺人俱有厚志魂行
當不可毋砥於來世故予得述而銘之云序班公諱璘

字尚溫狀云上世萬年人蓋唐右相閻立本之後也
立本始葬馬嵬原而子孫因家馬嵬元季避兵入蜀
洪武初四世祖名昌復歸馬嵬而馬嵬之閭延蔓不
可勝紀矣名昌生遵道遵道生秉直秉直生通奇偉
有異識鄉人賢之舉人材除南京刑部司獄娶張氏
早歿繼又娶張氏生子鐸天順成化間詩人世呼為
警菴先生舉景泰辛未進士累官至浙江右布政使
娶于曾太父太常公之女累封至淑人生男子三人
序班公蓋仲子也修軀丹頰人望之如瑩玉又性敏
善記兒時隨所口授書即過耳不忘先君子平陽公

嘗言警菴先生與余愍肅公飲序班公僅五六歲愍肅公指席上食蟬請曰八條螳螂腿即應之曰五色鳳凰毛其敏捷精巧如此是時警菴尚在即署一時縉紳大夫聞者罔不竒之弱冠從警菴遊四方益多規識前言往行收書肄學無所不博雖一器一物之小皆能察認世代人品萬不一失然多病不能奔走而性又喜逸遂故卒不有科第成化丁亥以警菴順天尹蔭當補國子生時周文公為祭酒深所器重每召語輒至夜分始退弘治辛亥除為鴻臚寺序班苦以不得省侍警菴為恨遂耿耿有心疾序班事不理

一二獨伏枕捐膺曰父老父老甲寅四月辛巳病劇不起年終四十又五也孺人趙氏通政趙伯顥先生女也世為北京大興人伯顥以乙丑進士起家娶宜人潘氏生孺人端莊貞淑有古女士之風襁褓時太學生高公見之曰此女不為貴人婦當為貴人母然貴家大族求者不可勝紀而通政公顧獨喜序班蓋警養與通政皆詩社密契友而序班公每宴輒待姑公熟見其美乃如此孺人自歸序班公則克諧孝焉康淑人極嚴肅也能獨得其懽心由序班公卒至今二十年辛苦備嘗操履無間教導諸子皆克自成立

為閨人而女子悉歸士大夫婦人之事可謂慊然無憾者矣正德癸酉三月丙戌以疾卒年蓋六十二矣生男子四人瀚滄浙溥瀚初娶种氏大竹令山女繼娶趙氏兗州知府蘭文滄先死娶趙氏樂至簿圮女浙娶薛氏涪川簿旺女溥正德丁卯舉人娶王氏故兵部尚書河州公孫僉事經女女子四人長嫁兵部尚書李公之孫順義學生桂次嫁翰林院修撰滕霄又次嫁王應麟又次嫁蕭奇元皆舉人也孫男子八人梅梧椿果校樓榎榭孫女二人俱幼在室夫序班公天性篤孝一舉不忍忘其親及仕有官職猶思慕

以死此其志愍然世未之能有也人恒言公遇異僧
善黃白得其術亦卒以不用又秦簡王嘗大陳古今
名帖圖畫徵序班公徧視之至則掩其題識問為何
人歷千萬軸無一不當王因悚然敬重矣其隱行遺
致皆載在閻氏家傳中可備頌說今得而畧云序班
公生景泰庚午正月壬申趙孺人生景泰壬申九月
庚寅其合葬也以正德甲戌二月己未銘曰維閻
之先有令德隆隆四世光乃則無言弗訓誰可測三
秦之文畢其力公為之嗣往安盡斯道不延年壽隔
子孫繩繩奕且赫斗城之南定幽宅淑音烜儀此焉

格鬼伯罔怒神永憚正月壬午我銘石仲春旦日工有翼

懷遠將軍西安右護衛指揮使陳公淑人曹氏合葬墓志銘

予為諸生時遽菴先生提學關內以予就業正學書院當時交與之士其最厚者曰陳裕後光祖予既忝竊第而裕後亦就襲替為右護衛指揮使矣裕後博學能文累不第場屋故往就此者謂非數邪或曰其父平林公之命也予以與裕後友也故往來西安則數拜平林公今年九月裕後以衰經來執吾友劉士

奇員外狀請曰先人以四月二十六日弃不肖光祖
將以某月日葬木塔里先塋與淑人合兆必吾子有
以銘其墓石使後世可以考先人之遺行茲惟光祖
之友也予惟平林公盛德偉容宜有壽考乃果如此
蓋其生正統壬戌三月一日至是則八十歲五福克
備名德不衰可與庸淺者道邪按狀公故順義人始
祖曰德元生五公五公生勝元末避兵野城而依舒
城孔氏孔氏為湯元帥部兵孔氏沒勝遂代孔氏為
帥帥兵修軀偉貌勇略絕人常有志值高皇帝
兵至河北於是仗劍歸之有功授千戶又從攻東阿

東平汶上皆連破之明年戰于齊眉山並子賢死於是贈明威將軍指揮僉事而以子賦為薊州衛指揮同知尋改西安前衛在西安能其官陞陝西都指揮僉事此平林公父也平林公諱銘字德新天性孝友母淑人高氏早卒至今思慕不忘生日則謝客茹素哀怛有加都僉公母以被命來陝事出倉卒不能遷葬其母語及輒慟時平林公方少弱冠也解之曰夫勞於國者不得私於家臣子之節無兩立也大人不能遷太夫人茲惟小子之責請終身不敢忘大人之所憂於是身自往董之數月而反葬焉其已異矣都

僉既卒平林公襲其官則益修都僉公之業德聞興焉靈州缺于將當塗者以平林公往平林公故善射靈州諸將盛致緡錢為注欲與平林公校射凡數回諸將悉莫之勝平林公乃悉得諸將緡錢無算諸將於是避匿平林公不敢言射矣平林公乃與諸將約曰能射勝者以吾所有緡錢厚賞之軍士乃各相砥礪挽强善射虜用憚焉未幾以王親調衛真定秦惠王奏留右護衛尋陞指揮使惠王薨簡王立益敬重公嘗問平林公曰居官亦罔利乎公對曰有之但未致出法害人爾王善其對既而曰若豈敢罔利

者也。御史李伯起按關中文武之吏莫敢正目獨平林公數見親信令訊疑獄則應機而決亡弗當盜李衡囑聚山谷時以為憂御史以公往得其罪盡釋其餘黨同事者或疑之平林公曰直當如是爾事上御史異焉以為長者也衛有屯賦平林公俱與為期約而不恃法衛人感之其課反最於他衛及其老而致去衛人無大小皆泣留於玉平林公乃辭去益懇於王卒從平林公而命有司歲給廩役終身焉淑人賀氏都指揮費公從孫也父曰銳為義官淑人天性柔惠貞靜八九歲即容止有常度及長益閑內則為

父母所鍾愛年十七歸平林公宜其家平林公有側室三人淑人待之甚厚所生子女無異已出及生裕後教之曰子聞世祿者侈肉食者鄙汝當讀書為聞人官蔭未可恃也生正統甲子十一月十五日以弘治庚申二月二十五病癱卒年五十又七矣側室高氏生子二人清源皆義官周氏生子一人濟張氏生女一人嫁劉千戶子大明孫男子十一人大策西安府學生乙卯武試第一與大壽皆光祖子大猷清子大忠大仁大義大禮大智大信源子大誥大詔濟子而又有孫女子九人二出光祖三出清二出源二出濟

則平林公之簡齋可謂盛矣於是為之銘曰位崇齒
穹後廣德豐有闕此宮茲惟元終

王安人魏氏墓志銘

安人者廬州學生魏鑒女也姿度婉淑動止莊謹十
歲值魏君卒與母高氏居無肯一失其意族中人人
奇之曰兒他日必為良人婦年十八歸陝西按察司
僉事王君姑劉氏者王君嫡母也王君生母亦為劉
氏皆以先人耀州學正贈主事公卒寡居于家而安
人事之曲盡其孝二夫人咸宜焉次劉夫人既有疾
能朝夕侍奉母急色及其卒黽勉匍匐以至成葬哀

慕毀痛至終喪未嘗少衰方王君為學生時家故儒門清簡無厚貲也安人能一切伸縮綜理使君得甘心向學後君以戊午舉鄉試乙未壬戌兩舉禮部不第因留滯京師者五年母劉夫人之養皆安人率弟愈極力而為之君既舉乙丑進士方欲圖省母君西還得蘭州差若頗便矣而母君抱疾甚篤安人事事無所不盡然乃竟不起於是母君夫人遺言君曰此孝婦兒歸宜愛之重之婦德與孝可使人人取法也君初仕宦安人偕居京師雖已貴有奉侍猶蔬食布衣無異儒生時有詰之者安人曰我儒家文所性只

欲如此爾一日君自部署還言及刑法之至某以某事合死或嘆息不安安人曰豈非欲求生道不得邪夫君為刑官民命所係苟果極冤當盡心以求其生即緣以受謫何害故君在刑部有美名令譽雖君天資夔特要之安人所助不少正德己巳冬十月安人忽有疾中子于宣刲股肉以進尋少愈矣明年庚午四月則病復大作以其月二十四日遂卒年才三十九爾生男子三人于蕃取朱氏僉事謙女孫也于宣聘閔氏舉人徹孫也皆向學克進取于旬且幼女子一人許聘知府李復貞孫孚交某年月日將葬安人

州北會龍山祖塋之側王君以舉人陳倉程勉學狀
來請銘夫婦人之性剛者或多悍柔者或多委至於
井然能以家事為理上不失舅姑之孝中克承意君
子而下逮僮僕罔有不善雖載紀所稱何加若王安
人蓋表表者也嘗聞王君言安人處如婢及內外姐
弟無所獲戾至僕婢之際雖甚嚴毅而憐恤之際獨
厚予向因家事怒諸婢將責矣安人因和色默諫曰
彼惟愚方為君役彼能一如君意且無後君矣君安
能役彼邪此意甚到可以語諸有位者毋以過望責
人中庸曰君子以人治人改而止此豈其遺意乎銘

曰婉能順婦禮以盡雖不享其厚而子之孝視已以
害愠龍山蔭蔭其飲且豐即未大其寵而蜀之人曷
不知為賢安人魏氏之官

明故文林郎監察御史王公合葬墓志銘

公諱英字文英家世扶風天杜人也高祖某曾祖某
祖某父林俱隱德不仕而家善富厚有貲蓄粟至萬
餘石凡遠邇借貸輒以半息為准故人人稱公家為
義王家云公生承家世饒裕益又長厚有量甲辰歲
關內大饑至人相食公視左右氓曰此皆吾故能養
者今若此吾弗與為之彼將安望於是出粟五千石

盡散予之約曰歲豐則償歲歉則已後歲豐矣計復業者十一二乃嘆曰嗟乎昔吾以粟與諸君謂可生
活相聚今既不能全其來乃幸有諸君在願棄素約
勿較於是諸存者咸感激曰吾輩無以報公願公世
有貴子弟後公子綸以鄉試舉人由真定知縣陟監
察御史巡按四川有顯名於時陞嘉興知府而公與
配孫氏繼室史氏皆被有封贈之命此非其冥報與
公叔父政嘗為某地某官隸有盜庫者則反揚言為
官公詣城隍廟禱曰官即不能奉遵散法乃何至為
盜神血食茲土獨不能陰監耶是夜與政各夢老人

語盜形狀甚合明日果獲盜此蓋其誠恕所感云孫孺人生男子四人繪緒紀而某早死女子一人嫁某姓孫男子五人孫女子三人孫孺人慈惠克相於公史繼之又克似其德因公刑諸內者有禮道耳公卒於弘治庚戌五月十三年止四十又九孫孺人卒成化癸卯正月二十七日年四十又一史孺人卒正德甲戌十二月二十四日年四十又一明年乙亥十二月十八合葬天杜南新塋知府君以平山令趙彥卿狀來請銘予曩在官秩與知府往來獨厚誼既不可辭天杜去武功近數十里聲語相聞知公行誼尤切然

恨公忠厚敦實如彼而壽但止是以為非天所以
鑒右良善然視其子孫又彬彬然盛遠此又若補其
所未足豈其數之一定雖天不可易與銘曰 德不
能壽享已克厚孫子綿懋天豈無右永茲焉咎

嘉議大夫刑部右侍郎郝公墓志銘

公諱志義字宜之世為延安清澗人自祖以上俱不
仕父安始讀書舉鄉試後為萊州府通判有惠政萊
人至今誦愛之娶夫人楊氏生公自幼靈異能旁識
十歲萊州公教之書背汲汲會大意也後教之朱氏
詩傳遂中成化戊子鄉試明年己丑又遂第進士明

年庚寅授為大理右評事受

命審錄河南罪人河南郡縣時且大旱矣公至折苑
罪成案三十五人釋拘繫三百七十人決有恃冒展
轉十人即大雨有年公由是名聞公卿矣三年陞山
西按察司僉事山西多獄訟乃悉置無事實取擇兇
盜無怙者嚴治之民盡畏憚之矣僉事三年陞副使
一年坐事謫福建都轉運鹽使司同知同知二年弘
治戊申復為山東按察司副使後四年母夫人卒去
官歲乙卯復陞山東山東三年陞四川按察使盡以
所治山西者治其吏民皆按堵矣四川三年陞山西

布政使司右布政使尋陞山東左布政使未幾通判
公卒巡撫都御史徐公知公貧莫可計大事也以百
金贖之不受四年乙丑改四川左布政使尋陞都察
院右副都御史巡撫湖廣等處湖廣民貧察吏多黥
慧無狀公曰吾不可為有司之事也下令郡縣有吏
能慈惠百姓者巡守官以實事白迹其不法者罷黜
之湖廣父兄皆私自唁憫以為有父母育撫也時年
正德丙寅

上方圖用舊典刑部缺右侍郎公卿交議宜用公代
乃詔為刑部右侍郎將行以十月七日病不起湖

廣父兄子弟若喪考妣矣三司文武之吏莫不相望
痛悼矣夫公天性剛介歷官三十有八年終始亡有
撓焉雖甚顯大又僕實不華也踰三月子序始自故
鄉來扶柩歸且葬矣乃走京師以考功主事王納誨
狀請海銘以昭白公之先烈海舊遊公卿之間聞公
之風甚烈且公為先達所效慕也敢以辭耶公生正
統甲子某月日春秋六十又三矣初娶夫人白氏兩
淮都轉鹽運使行順女有德宜於公封孺人卒生男
子二人庠學文有行蚤死序既舉於鄉且履孝不悔
行當嗣公烈矣女子一人嫁為綬德衛千戶申鑑妻

繼娶夫人孫氏鴻臚少卿慶都鉞文德如白夫人生
女子一人嫁考功已封為安人某月日甲子將葬公
石甯原祖塋之域與白夫人合兆銘曰 顒顒我公
維秦之英維國之楨維民之刑弗展厥成悲此石銘

明故封中憲大夫彰德府知府劉公墓志銘

公諱景字時華中部人也其上世祖仕元為萬戶譜
亡其名生七子曰劉澤者萬戶第四子也生簡簡生
君傑君傑生處榮處榮生縣學生準準娶僉事折某
女生公公生三歲而亡父母拆改適他姓以公隨之
及公壯繼父亦死將乃携公歸劉氏娶知縣高秉文

未幾為有司擇選為縣吏惴惴小心不敢少有所肆於是縣官器而愛之三考已乃拜保安州洗馬林倉大使繼而陞亳州義門巡檢巡檢三年值子達夫以進士為太平推官迎養來遂棄官居太平數月乃歸中部鄉人且以公身富子貴或有所更易炫耀而公惟以恬淡自居雖惡已者莫不起敬也後達夫陞彰德知府迎公與高夫人養知府邸中海時以得告送母過鄴就以拜公頽然偉丈夫也其容質而肅其氣和而莊私謂必享高年膺福祉乃今一如所億長者之所履其容貌辭氣果足以逆見如是也後達夫以

御史奏有治狀

孝宗特錫誥命封公為知府而高為恭人公嘗謂達夫曰吾以微賤賴汝至此吾老且斃亦無以報稱德意惟爾謹官審度捐軀竭力耳天性孝友凡所能致者無不盡心力為之其葬母與兄事具載劉氏家乘中雖頗於典禮未合而惻怛慈愛之意足以通天地質鬼神無遺憾者矣達夫言公在義門時得小盜數人兵吏以為喜公曰此貧窘所至可舍之吾所求者大盜橫賊也後果有大盜劫人或曰盜勢盛不可易敵公奮然先登曰不得此吾不可一日居義門已

而群盜悉獲於是義門三年卒無盜矣生有三男子一女子皆出自高恭人三男子者玫琰璋也玫早歿琰即達夫丁未進士累官至都察院左僉都御史巡撫順天薊州等處稱有良治璋順天舉人女子適鄺洲王舉孫男子十二人伸縣學生儀偉監生玫子也佐辛未進士戶部主事卒儼監生侃舉人倅縣學生仁舉人達夫子也仕舉人价倅儒璋子也孫女子八人已嫁者三人聘者三人其二尚幼也又有曾孫男十二人曾孫女七人嗚呼盛矣正德丙子二月八日公卒於家邇其生宣德戊申四月六日壽蓋八十又

九達夫將以十二月十五葬公鐵子坪之陽與高恭人合兆以予嘗與銘高恭人之兆也至是復以公銘屬予予於達夫有兄弟之義則公銘宜不可辭銘曰德厚享延孫子允繁昌宗允先惟關中之艱冢土有埏胡不萬年

奉直大夫通州知州張君墓志銘

君諱舜舉字邦猷別號東崖子家世武功人勝國時代有令人曾祖輻生顯宗讀書不仕為縣啓蒙師予猶記其教法嚴肅為近所未親也生番為鄉飲賓以君貴贈承德郎配鄭氏榆社丞莊女也亦以君貴贈

安人生君與其弟舜賢君天性穎悟不亢長為縣學生科目文字所出必異先君子特愛敬之後果為遂庵虎谷時敏所重弘治甲子中鄉試高等以乙榜拜太原縣學教諭教人有法諸生畏焉丁卯應聘為順天同考最號得人已有鄭安人喪服除復祿城士大夫見其教法甚禮重君庚午復應聘為四川主考所收皆名士尋陞儀封知縣政通人和蔚為中州守令之望撫按以才堪於繁奏調內鄉聲稱日隆吏民益協薦論之疏後先相踵未幾封君卒乃以憂歸起復吏部時大興缺令部尚書殊難其人點名及君曰

吾有良大興矣君處至繁之地若無事然京師人語
曰

天子愛民錫我良令大興廳事久廢壞至不能蔽風
雨君請於上以官房為前後堂輪奐之美甲於畿內
公卿具以其賢卓絕於時值通州缺守遂陞君知通
州通州去京三十里東南要路也中多貴人宦官凡
事相涉有貴人者請謁不獲遂以誣罷君君慨然求
歸詩酒之遊里閭之樂凡七閱年其心陶然非區區
以仕為撫者班也嘉靖庚寅三月丁巳病感寒不起
由生成化丙戌月日春秋六十有五初娶徐氏卒無

子繼娶王氏壽官鉞女也俱封安人亦先君卒生三
男子長汝為季汝明皆縣學生仲汝翼服家人業一
女子嫁生員談文孫男子二善繼善性孫女子二幼
未許聘又繼娶馬氏清豐簿萬衢女汝為等將以是
年十二月庚申葬君於城北祖塋與徐王二安人合
兆狀來請銘予與君殊厚義不可辭因記君大興事
若審編之公惟醴泉解理常與君不避豪右毅然獨
行為民所悅服他無聞也其謙以居鄉黨以蒞職則
士大夫之艱節若君何忤哉銘曰 城北之阡撫撫
延延同賁厥儷萬世是安子孫振振後不愧前詩書

之裔武功是瞻君才偉卓蔚惟時賢位不並德壽胡
亦然昭茲我銘倘為世傳

明故迪功郎承天府經歷周君墓志銘

君諱冕字時制鳳翔人也高祖大安曾祖濟祖楫父
恕皆隱德弗耀母劉氏生君一人補府學生正德庚
午奉例為國子生嘉靖丙戌除汝寧府經歷汝寧庫
盜失庫銀知府罪典者君曰盜庫者盜非典者也後
果獲盜知府以君為明令領巡捕事民得無冤豪強
有所怙恃者悉不敢縱己丑丁內艱壬辰復除承天
府經歷故安陸州也為

上潜邸

獻皇陵寢在焉送往迎來視他府特加繁劇君承知府之委處之裕如知府以私事屬君君曰殺人以媚人吾不能也於是與知府相左凡有難且疑者知府必以委君君立辦焉而當道嘉賞日至分巡副使鄭公又禮遇之贈之以詩知府卒不得志於君矣丙申十二月官滿將上考績七日戊子疾卒由生成化壬寅九月四日巳亥享年五十有五配張氏生男子二人長易戊子舉人次詩方事於學女子四人金汝麟主員郭交劉交強容督也孫男子二人有士有人明

年丁酉九月二十七日癸卯將葬城東審平莊先塋
之次易持吾友立庵先生狀來請銘君之墓石按狀
君瑰偉激昂以氣自負里中賢豪莫不樂交於君人
有過輒面數之已而相與如常人愈益感君嘗讀項
羽傳至烏江不度曰丈夫之志也可以識君矣君有
伯母侯氏寡而無子君養生送死曲盡其道又有鰥
舅寡姨皆無肯令失所孝友之性顧如此世之妮妮
僕僕馳驟功名者視君何如也立庵宿無妄語其稱
君殆不容口益可以知君矣易之所就當不可量天
道果無知耶銘曰鳳翔之區古雍州靈勝所萃賢

俊稠周君磊落人罕儔科場失俊中詎憂靖恭爾位
將焉求直道不回惟所投敦義篤孝思悠悠視彼僕
邀君獨羞佳兒英英實啓周君之潛德永弗休
龍章迤邐光爾丘

中順大夫知岳州府劉君墓志銘

君諱煥字堯章真定藁城人也高祖諱聚生迪功卽
大寧縣丞聰聰生清清生某登辛丑進士仕為浙川
知縣娶侯氏生君與其弟某皆讀書善文弘治壬子
君舉鄉試第七人明年遂第進士又明年授戶部陝
西清吏司主事管太倉出納人咸稱宜焉太倉滿又

出權蘇州商稅蘇州商市多權貴來行商商者多附綴挾重貨也君至稍稍出約束下權貴者皆避去矣商者又人人得平故官稅亡弗及焉丁巳母太安人卒至庚申免喪明年復為陝西清吏司主事侯夫人為太安人復出權稅臨清臨清之事視蘇州益嚴其商市者益寬也壬戌陞本司員外郎一年遂陞知岳州府制京官五品非三年上者不得出治郡兵部尚書劉公力以薦君故君往焉比至岳果事事整齊為之向所糾結弗列與憊廢弗新者皆判然舉矣於乎其可謂循良已矣正德丁卯岳政成來吏部考功至

臨清病瘳至京瘳大作歿矣初岳人來吾嘗問君岳人皆爭述君善郡也吾謂君如古良郡者矣曷乃有爾也君生成化戊子七月甲戌年纔四十耳其所享又何弗引也於乎異哉君娶張氏有女德宜君封安人生子一曰堪女一曰某皆幼也明年戊辰月日將葬城西武家座西原先兆安人之兄藁城學生張君持狀來謂君與吾善也宜吾銘君銘曰明之弗光也享之弗長也嗟乎君之亡也

明故承事郎輝縣知縣李君墓志銘

君諱傑字民望上世馮翊人也始祖仁卿避亂居華

子孫世為華州人仁卿生剛剛生清清生讓早孤依
繼母秦氏及長秦氏喪明事之曲盡孝道以勤儉起
家人至今稱孝友云娶王氏知真定縣王公徽女也
生君少穎拔有志故兵科給事中東公見而奇之因
以女許妻君及長為州學生綽有譽聞中正德丁卯
鄉試累試禮部不售值王孺入年高乃慨然嘆息曰
嗟乎古人一日之養不以三公易親老矣何必第進
士然後官也乃出為汜水知縣有善政良法民吏皆
敬憚之未幾王孺人卒以憂歸華哭泣之哀顏色之
戚蓋近所未有也洎滿喪乃悉取守令行事著於編

九十餘卷曰不如此則不可以盡當官之責復除知
輝縣敦禮崇義平訟均賦民有賴焉暇則舉廢墜表
往迹百泉書院及蘇門嘯臺皆輯而制之居常以禮
自守一介非禮弗為也見上官恭而不隨或有過諂
者則赧然羞道之曰是過於夏畦也夫辱身而賈名
趨利而毀節即榮名厚利丈夫弗為也居輝二年卒
於官貧不能歸州嘉靖癸未三月朔旦也距其生成
化丁酉十月十三日春秋四十有七無子有女三人
其二東孺人所生其一出側室賈氏豈數命相乘有
適然耶抑天道果無知而使善人志士如此耶甲申

七月十日將葬君於華麓先塋予以事來入華孺人弟舉人希大洎其伯兄希仁持伯弟監察御史希宋狀來請予為銘予昔往來華邵數與民莖交知其為人直諒有道實器重之乃何以無銘於君之墓石狀稱君趨向高尚宵次磊落常扁座右以為天下第一等人行天下第一等事自期閉門讀書屏絕人事耻安小成罔趨近利於乎其亦偉男子哉方希宋巡按歸有左遷之報君乃謂希宋曰子豈若祿仕者耶反覆數十言載在行狀中故希宋歸志益堅更無可回者豈非超然有見者耶銘曰華山之麓其墳穹然

是惟君宅行義不爽俾艱厥嗣天亦允惑子德孔荏
子行弗長子名則揚視履罔斁天乎何忌永茲千世

對山集卷之四十一

康對山先生集卷之四十二

墓志

昭信校尉太原右衛百戶霍君墓志銘

君諱

字

上世山東新城人以從軍太原遂家

山西焉至君父勝以總旗從征有窄溝功授本所署
百戶配安人某氏生君及弟昂君負氣磊落天性惡
諂佞而尊事直方善談時事精騎射數為遊兵前鋒
叅將姚君信都指揮高君登盧君卿皆相繼委任或
延為幕賓咨議邊務先時偏頭關迤北羅圈堡濱河
每冰合則虜寇先至當道命盧君設守以君贊畫之

力虜十年不復窺堡坐是預選軍政令兼十百戶印
十百戶人人愛戴謂有倚賴老瑩堡在北邊有兵馬
錢穀獄訟之事號繁劇難治以君宿有風力特選任
之不一年上下稱善矣有將官家奴自開堡倉出豆
百餘石監收以下莫敢言君執縛其人迓豆于倉移
文撫按正奴罪而劾主將堡中小大莫敢易命一日
虜自鎮西入寇其鋒甚銳君率仲子鳳與數騎追斬
驍虜一人總兵者奪與所私君曰吾父子躬冒矢石
得虜首乃為執力所奪吾雖不得此天當別有報吾
者不數年季子鵬第進士此非天為之報邪由是稱

病還太原優游田里若將終身焉及鵬知咸寧君兩
至囑其行事曰居官能若此可謂不負所志矣遂決
意東歸比歸值坊門落成知太原黃君就第加賀仍
題坊曰文武濟美時君已嬰疾與盡歡而罷曰吾年
六十子其成立死復何憾是年戊子六月二十九日
果不起訃至鵬持知長安李君伯音之狀因表第刑
部主事閻公甫請予銘君墓石狀言君先娶安人劉
氏生三子長鸞襲百戶次鳳理家人業又次鵬壬午
舉人丙戌進士今知咸寧清才駿譽將來未可量也
劉卒繼娶何氏未逾年又卒再娶司氏生二子鵬鶚

尚幼女子三長適百戶葉子顧天民二尚幼居室孫
子四人州川岱岳生成化己丑二月九日至是年六
十雖不期頤已及下壽嗣續之繁文武之胄赫然名
于山西君之福履可謂厚矣予往華山過長安咸寧
君數就問予以是知君之家訓賢于齊人多也義不
可辭銘曰太原城北澗河原其高穹穹晉所瞻君與
安人合葬焉子孫螽蟥碩且繁文武衣冠為世傳繁
君之祀宜萬年我銘在壙何可湮述德耀功惟後賢
射洪縣儒學教諭泔阿文先生墓志銘

先生諱清字潔之醴泉人也勤學好古一時英雋之

士皆莫能及累試不售歲貢上禮部得請除綿州訓導循循善教士子感焉乃後擢射洪教諭至則以所以教綿者教射洪皆颯颯乎有蘇湖之風值藍鄙之亂蜀方不寧先生在綿保障之功至今人誦之其文武之略可以槩見矣歸田十餘年非禮不動迪德益弘乃以癸巳六月不起享年幾十有幾八月戊子將葬先生于新兆其第四子舉人藻以進士張君狀來請銘其墓予聞先生名義方正光大心實慕之後于乾州會諸公言藻之文采過人私以為必文先生子也乃今見藻因足以知先生之懿德當不朽于世其

焚券罷償諸事鄉人仗義者亦能之而况先生哉其
事繼母救群弟皆輯變以常蓋大君子之難事於乎
此先生之所以為先生也士大夫尊而信之鄉人誦
而法之不亦宜哉卒時風雷之變酷暑若無天之于
善人蓋若是益可以觀德矣先生初娶楊氏生子質
直采繼王氏生子藻英蔚蓋六子云女子四人皆歸
名族良士孫男子七人宗堯宗湯宗舜宗禹宗正宗
理宗義而又有孫女子九人焉其胤昌矣為之銘曰
位弗滿德顯厥後巖巖科名子奄售九峻之下土維
厚君斯藏之福如輳子孫振振賢且懋世萬不數名

宇宙先生之德胡不壽

庚午解元吉原靜墓志銘

原靜諱體仁姓吉氏馬嵬世家也高祖某曾祖某祖
贊父友文皆世有懿德富而好禮馬嵬人重之友文
娶張氏生原靜幼敏悟不凡讀書輒旁求指趣作為文
辭豐贍有氣識者恒以魁解許之從谿田先生治春
秋隨試庚午果中鄉試第一主司以為稱任累試禮
部不第益更自勵以求必舉及乙未又不第原靜曰
吾倦矣予黃山之下有泉可濯有田可耕安能役後
自苦益歸乎來課子蒔藥以終天年比歸寢疾十餘

日而卒臨卒索紙筆書七言律一首投筆而絕英邁之氣超捷之才不以將死少餒非養之有素能若是邪於戲可惜也已由生成化甲辰十月三日丁巳至嘉靖乙未四月二十四日甲寅享年蓋五十有二於乎原靜事親孝教子嚴內外有則舉措率禮予殊佳其為人方謂可以大受乃至如此斯非數邪配劉氏興平名家女生男子五人長來逢守家人業次來獻來朝皆廩膳生次來旬方進未艾女子四人長許聘予姪餘幼其一則側室某氏所出孫男子二人曰順曰換梁孫女子三人俱幼是年七月二日辛酉將葬

原靜于北原新兆來朝來以予銘其墓石銘曰英邁
之氣琦瑰之才位既不逮命復罹災於天謂何胡寧
弗哀美名雋操終古是瓌從以令子胡德之衰北原
窪窪求奠玄臺刻石啓後用覲厥來

李君宗之配毛氏合葬墓志銘

君諱儒字宗之其先洛陽人也七世祖某挈家避兵
入關中占藉鳳翔德化里求樂中以戶口不及改實
昌里今世為鳳翔寶昌里人四世祖希道仕為黃岡
丞生子原為君曾祖原生子鐸為祖鐸娶李氏生子
廷用為君父廷用娶崔氏舉人敏之次女乃生君祖

鐸殊愛君嘗曰此兒質甚美當從事于學因命曰儒
即能敬受祖訓黽勉淬礪讀大學論語通大義矣遭
父喪而祖老母寡弟幼口食所仰不欲重煩大人乃
請循父業祖泣而勉從之由是生意日懋矣配毛氏
處士亮之女也有婦德事姑殊孝事事宜于君故君
承業數年祖不知其無子母不知其無夫弟不知其
失怙亦毛有以相之也後祖以壽終君居喪一無違
禮又數年君挾貲往荆襄母崔氏病作毛請醫禱天
無有弗至凡數月未嘗頃刻離左右及卒衣衾棺歛
躬自料理人以為難能君聞訃哀毀成疾毛遣其子

涵往迎之歸疾已篤毛禱天乞以身代乃竟不起臨終謂毛曰吾生不能侍母抱恨終身幸此兒在可善教之以若吾祖之志君卒後十有二年涵果舉鄉試高等初仕為高唐知州撫按以其有善政交薦于朝陞河南同知時毛皆在迎養孝姑之報天道昭然安可誣也癸巳秋九月五日毛寢疾不起由生天順己卯二月五日享年七十又五君生景泰乙亥十一月五日卒弘治乙丑二月十五享年五十又一又明年乙未月日涵將合葬栢林凹新塋以予銘其墓石夫毛之孝道姆儀皆可誦說而涵之居官守身表然在

人將來所就其封錫之命優渥未已不但近日應詔
一時而已涵雖一人又有四男子占杏召啓雖俱幼
其進莫量與二女子厥胄昌矣銘曰維孝動天維德
啓後嗟嗟李君履罔或謬郭南之阡與媿同竇孝道
母儀千古如畫孫子翩翩實發實秀縣縣翼翼王蘇
是壽我銘弗諛後人其究

處士張公墓志銘

處士諱璠字廷玉世武功人也曾祖大父羽舉鄉試
高等仕為山西文水知縣配康氏生輻隱德不仕配
馬氏生顯宗讀書不仕鄉人延為弟子啓蒙師嚴毅

善教其子弟皆循循有法度後繼以為教者萬萬莫能及也配馬氏生處士幼倜儻好義氣而天性率直自便鄉人無小大皆愛重之喜飲酒行樂無所量際遇賓客或所私重則傾倒靡懈其胸次豪縱蓋大抵類是云正德丁丑八月庚戌以病荆卒於家由生正統癸亥五月乙丑春秋七十又五娶鄭氏榆社縣丞鄭公莊女也貞淑宜於處士年若干早卒生男子二人長舜舉甲子舉人歷太原麻城教諭有文名兩聘為順天四川同考官已而陞知儀封縣才廣效長撫巡者以為不可處以小邑

奏政知內鄉方駸駸向用而處士卒矣然後當致有
顯命於處士焉次舜賢孫男子三人汝為汝翼汝明
皆讀書脩學孫女子二人一嫁生員談文并汝為等
皆舜舉出其一嫁親侃者舜賢出也於乎處士不理
小節而大體嚴整平生與人無所私怨至於議論之
際則侃侃不假借或有相詰者則大笑以謝曰我性
益若是自舜舉連仕以至於今以予為故親且同里
聞也則日相款洽故知處士益詳其孫子盛衆有文
采宜矣明年二月日與鄭合葬縣北祖塋之次舜舉
以銘請予於是銘曰

郃城之北其土沃而厚其墳巍而瞻乃處士廷王之
阡孫子綿綿其後孔賢魂魄永安於保爾萬年

義官李公改葬墓志銘

君諱英字世傑其先平涼草峯里人也祖曰李三
國初時攜為西安後衛軍屯三原豆堡里子孫遂世
家豆堡云公父諱忠有器量不行心計勤儉自艾人
稱為長者配王氏生公頗體脩髯讀書習事綽然有
父風天順間從軍榆林虜大入寇嘗斬獲虜首為部
將所奪去公不能平以聞於

朝廷既而部將重賂證者則竟以功歸部將公曰吾

自盡心報國耳何屑屑與部將爭已而部將所得之
級亦竟以訟削去時有王都督珎者甚壯其義氣焉
成化己亥輸芻助邊為義官又三年甲辰關中大飢
至人相食也有司以公忼慨有口勸公出粟賑飢者
飢者得公粟則生活若干人也人稱公富而好禮勇
而能忍交而不群其信然乎生求樂乙未七月三日
卒成化丁未七月二十日春秋七十有三配陳氏處
士伯通女也端莊有容恪守婦道事上逮下一中執
則子孫雖甚愛亦必嚴以教之曰不可使玩而難化
也生求樂乙未十月十一日卒弘治戊申七月二十

八日春秋七十有四生男子三人璽聰明而明為國
子監生女子四人邵能潘鉉趙景陽党鵬其壻也孫
男子十有二人仁儒倫俊佐傳信傑偉偕伸价而伸
舉壬戌進士知臨汾有善政陞山東道監察御史孫
女子五人曾孫男子十有八人曾孫女子二十有二
人玄孫女子一人弘治戊申己合葬某原先塋正德
己巳十一月某日伸以母氏之喪歸三原會其父君
重痛其兆嘔隘臨阪非永久之道乃遷豆堡新塋西
新塋兆中伸來武功以海銘公之墓海不敢辭銘曰
有德有壽矣有子有孫以至於立矣賢而傳矣遷而

安矣何弗延矣

劉處士墓志銘

興平處士劉公以正德癸酉冬十一月九日卒於家
子成都府通判寶由成都來治葬縣南周村先塋以
明年甲戌冬十一月廿又二日葬公於此走使來武
功請為之銘按狀公諱江曾祖忠祖亥才父達成以
好義樂善稱於鄉閭達配馮氏以正統壬戌十一月
五日生公天性篤孝馮氏早卒事父曲盡其孝出告
反面內外無間言嘗宿旅外舍見城中人必問見父
否否必求問見者見見者必求其衣冠動止或言其

衣冠整飭即喜或言其未飭即忼忼恐懼曰此必有
疾病雖夜必馳返至父所問慰乃已父每病左右就
養衣不解帶者累月及其卒哀毀至骨立資送一從
腆厚惟其所有亡肯留惜迄其終身蓋四十餘年追
慕迫切之至便爾泣然流涕有所飲食必嘆曰此不
得復奉吾親也見子孫成立者必嘆曰此吾親所不
及見也壽日子孫戚黨稱觴咸至必哭而却之曰吾
親安在吾可以受爾奉我也易簣之日遠近痛悼蓋
仁人孝子風轍所在自足以起發人心如此曩予為
諸生與通判君甚厚往來興平必就謁公公之溫然

和毅然敬心竊慕之顧其精神完粹體貌充發必可
百歲以視其子孫之榮養乃止如此雖已躋有嘉壽
然視履考祥猶所未足也配符氏生男子四人寶貴
資實女子三人王保子霄與學生王大叙壻也孫男
子五人某某孫女子一人幼未許聘銘曰

始平有古風是惟劉翁翁德克長惟劉之慶子孫綿
綿翁孝是延是延是似何不克世欲翁之思視此銘
辭銘辭不刊世萬孔安

咸寧李處士墓志銘

處士諱萱字廷芝咸寧人也其上世不可考自曾大

父忠始服賈著姓為關中所稱王子曰道安道安生
潔潔取賈氏生處士惟敦樸無華兒時則不妄笑語
人咸異焉稍長入鄉塾誦詩讀書方勃勃興也乃廢
為家人業則多所蓄積關中業家人者未能或之先
也一日翻然曰夫人貴知止有足富貴非可以必終
何日僕僕然母有已期也吾鄉人往由維揚起家者
至多然或多貧莫返者此奚不能恒富然逸而蕩蕩
則莫之據而貧其勢易及覆手也吾何若放情丘壑
與鄉人日聚會往來使不失吾田廬以覩示於子孫
哉於是出金於逸拜散官章服委蛇生老病死非閭

里不遊也某年月日以疾終於家享年六十又五其生蓋景泰甲一也處士天性純孝事親曲盡愛敬飲食必親居鄉黨恭默謙厚不言人過所與遊必德似行同始相周旋咸寧人蓋故以長者目之云初娶董氏生一女子為張倫妻繼劉氏生一男子曰秩癸酉科舉人再繼董氏生二女子深州吏目管朴引禮舍人張子之壻也秩生男子二人企膺企同企膺已娶勾氏女俱讀書事學女子一人幼未字此非德厚效長者哉予往歲游華郡過長安見士大夫言徐伯瞻侍御令咸寧時適處士家當里甲伯瞻好

賢禮士則欲蠲處士家里甲處士曰吾家幸有秩為
長侯及士大夫重然視同甲顧吾家獨富厚安可重
累貧者與竟其後伯瞻殊敬羨焉此亦足占其後矣
明年九月日將葬鮑陂原新兆秩以其友閭舉人溥
狀來請銘溥為予表弟而予嘗因溥以識秩甚厚宜
有以銘銘曰汝樸而昌其胤孔良厥宗以光卜此祥
岡萬世所藏

張附羽墓志銘

君名附羽字于霄蓋屋人也曾祖曰國子監生成祖
曰處士深父曰唐山王教授俊初教授為四川新繁

學官以君與弟附翺皆穎悟強記可讀書舉進士日
日為程課以驗之既數年驗其俱可乃俱遣為盤屋
學生自歲季科舉諸考凡言盤屋學生者必曰張氏
附翺附羽云附翺既舉弘治辛酉鄉試君乃益淬勵
及甲子亦舉鄉試可謂奇矣今年九月十四日以傷
寒疾醫終弗瘳乃死京師正陽門外逆旅舍中年三
十又二遺其妻田氏與其幼女三新生子一微附翺
與同在君且何以歸也噫嘻痛哉余正月過內立時
君自潞州省父教授回余望之視為學生時若變易
遠也乃至是何哉由其議論觀之宜可舉進士即不

舉能逮其通銓籍焉亦可矣居京師兩年士事備而死也乃皆不然焉豈不深可惜也人有孝者天必培以享遇之福君事母辛氏雖口食之細亦不忘有所奇異輒不食必以歸奉焉有疾病時時問慰摩切靡肯有間斷也何獨不享又并其壽與促之耶豈固其數或有然耶附翺泣拜告余曰夫子與兄弟俱交且厚願有以銘之使不朽乃銘曰 人之良藝之工於是以前終有子在抱弟以克恭曷為其窮

甥婦楊氏墓志銘

表甥王德華以嘉靖乙酉冬十月八日喪其新婦葬

後七年辛卯秋七月赴試過武功出其兄舉人德光之狀乞予銘其墓石若曰甥今已娶安定楊氏生男女矣而新婦能孝吾親睦吾姊妹與嫂敬事吾舅不可忘維舅憫新婦之火天亡也庶幾錫以不死之道予覽德光所撰狀心感新婦之賢焉曰嗟乎新婦少女子也而能如是非所稟純粹貞淑要以異諸人者遠矣按狀新婦隴西人祖鐸懷柔知縣父廷濟庚午舉人母李氏早歿育于祖母劉氏年十九歸德華事德華祖母太夫人洎其舅姑皆喜謂其有婦也及太夫人卒新婦哀毀過于所生而處德華姊妹洎嫂略

無爾我至疾病相與扶持久而弗倦是歲疫大作王氏病者相枕藉新婦初視德華妹疫湯藥之供一切親與為之或曰疫染人當避也不聽曰何親如姑嫂者未幾德光妻復病值德光如省治太夫人葬事不在而新婦於凡湯藥之供又一切與為之甚至以口哺藥略不計其傳染也或又有言者曰嫂與姑同兄不在責當在我我與嫂均失失毋吾安忍不救嫂相與寢處者幾月餘嫂疫欲間而新婦疫疫浹旬而新婦不起矣若新婦者殆行法俟命者哉德華言新婦事已誦讀燈火必親必躬雖寒暑母問此婦人恒德

予獨傷其視嫂與小姑者千萬人不可強而能也雖其祖母劉教之有素而天資之美要不可誣矣新婦生弘治甲子六月十六日至卒之日享年二十二歲云為之銘曰爾順爾淑天裨孔厚顧爾弗壽予將焉咎銘以告哀賁爾泉臺惟爾休哉

蕭氏妹墓志銘

妹姓閻氏故順天尹馬崑公鐸孫也馬崑公娶於先太常公之女是為予太姑生妹父鴻臚公璘而鴻臚公娶太興趙通政伯顥女生妹女兄弟四人趙夫人以妹季且屬愛也於是議婚輒難曰必得當是者斯

可與之舉入蕭奇元者為諸生時以文學獨知名與
表弟溥為筆硯友嘗謁趙夫人夫人異之曰此所以
同吾子遊者翌日蕭氏議婚來夫人欣然曰我女宜
為若婦今便許之及妹歸事舅姑克盡禮孝舅姑甚
宜之而汝弼弟妹皆幼妹一切愛厚勞問其弟妹依
然若同胞也妹天性慈孝恭惠雖出貴族其循循執
禮獨終始毋少替然淑靜寡言笑故能精緻女紅姻
鄰見者自以為莫及也曩汝弼向學勤苦罔以寒暑
間旦夕妹曰夫能厲志如此我安以簪珥為有所不
逮解以資之此少年修飭之人能卓卓若爾雖與鷄

鳴所稱何異哉趙夫人卒妹號泣嘔血勸不能止表
弟瀚者妹長兄也妻遺襁褓子女時妹在室恐重遺
趙夫人之憂乃身自撫育皆至成立趙夫人曰兒可
為魯義姑歸必宜人正德乙亥八月戊午卒於產由
生弘治戊申三月癸未則年但二十又八爾生男子
一曰蔡兒汝弼將以明年正月乙未葬秦墓先塋之
次以狀來請曰竒元不幸喪此懿配上痛兩親下愴
孤息兄其為銘之銘曰孝不畢生宜不逮亨育不視
成天實為之悲此芳齡

對山集卷之四十二